



Activitads da temp liber – sco per exempel il trenament da juniors da ballape – sa basan sin blera lavur gratuita e voluntaria.



Sch'i arda èn ils pompieri voluntaris indispensabels.



Per lavurs da guaud è lavur voluntaria impurtanta. Qua èn da vesair voluntaris durant la lavur.

FOTOS SOMEDIA

## Onurar e gratuit

In terz da la populaziun en Svizra s'engascha cun prestar lavur voluntaria. Era en il Grischun s'engascha fitg blera glieud en uffizi onurari e gratuit per contribuir al bainstar instituziunal ed infurmal ubain per il bainstar da la societad.

MARTIN GABRIEL/FMR

En occasiun da la surdada dal Prix Benevol Grischun il december passà, ha cusseglier guvernativ Jon Domenic Parolini affirmà che la lavur voluntaria saja indispensabla per il chantun Grischun. Senza voluntarias e voluntaris en las vischnancas, en la cultura, en il sport u en la politica na pudess la vita da mintgadi betg funcziunar, ha Jon Domenic Parolini ditg a la FMR. «La lavur voluntaria è fitg custaiavla e preziosa. Er nus sco commembers da la Regenza, stuain adina puspè render attent a la publicità a l'impurtanza da l'engaschament voluntari per che nossa societad possia funcziunar.»

### 660 milliuns uras per onn

«Questa cifra da 660 milliuns uras lavur voluntaria per onn en Svizra, m'ha impressiunà fitg», ha Jon Domenic Parolini ditg suenter avair udì quella. En media presta la populaziun Svizra circa 1.6 uras lavur voluntaria per emna. Ils umens sa participeschan pli ferm a las organizaziuns ed uniuns (lavur voluntaria instituziunala) e las dunnas prestan dapli servetschs infurmals, vul dir en il ravugl dals enconuschents, vischins u parents. Malgrà quest engaschament fitg grond han bleras societads e projects che duvrassan ils voluntaris difficultads da survegnir persunas ch'èn prontas da prestar lavur voluntaria. Er il schef dal departament chantunal da cultura, educaziun ed ambient constatescha actualmain in tschert individualissem en la lavur voluntaria. «La cuminanza ha patì in pau ils davos decennis. Cun la bainstanza da la societad ha mintgina e mintgin cumenzà ad ignorar la lavur voluntaria. Quai è fitg donn.»



«Cun la bainstanza da la societad ha mintgina e mintgin cumenzà ad ignorar la lavur voluntaria. Quai è donn.»

Cusseglier guvernativ  
Jon Domenic Parolini

### Lavur cumina ha tradiziun en il Grischun

En vitg e val dal Grischun ha la lavur cumina ina gronda tradiziun. Il cas è quai tradiziunalmain en l'agricultura, nua che la lavur cumina sin las alps vegn anc adina cultivada fitg savens. Il medem vala per ils pompieri e per il sustegn vicendaivel tranter vischins. «Quai ch'il maun public, damai er la politica, po far per promover la lavur voluntaria è da sensibilisar la populaziun e da mussar la creaziun da la valur da quest engaschament», uschia Jon Domenic Parolini. E plinavant: «Che questa lavur vegn

renconuschida mussa per exempel il Premi Benevol che vegn surdà en blers chantuns da la Svizra.» Il cusseglier guvernativ ha era fatg allusiun als certificats che vegnan fatgs per lavur voluntaria. Quels certificats stuessan ins a ses avis ozendi er duvrar per annunzias per piazzas da lavur.

### Tge poss jau far per nossa societad?

Per cusseglier guvernativ Jon Domenic Parolini è questa dumonda la basa per ina societad che funcziuna. Questa dumonda stoppia mintgina e mintgin far «en il senn da la responsabladad persunala da vulair viver en ina societad che funcziunescha». La qualitad d'ina societad possia en mintga cas vegnir mesurada vi da la lavur cumina voluntaria.

### Cultura gratuita ubain cultura pajada?

Fitg blera lavur voluntaria en il Grischun succeda sin il sector instituziunal. Quai vul dir en las uniuns, organizaziuns ed en projects. Per exempel er uniuns culturalas. Tenor il schef superiur da la cultura chantunala, Jon Domenic Parolini nun è quella cultura betg adina cultura voluntaria. Qua stoppia vegnir differenzià tranter cultura professiunala e cultura da laics. «La cultura professiunala sto sa chapescha vegnir indemnisada, perquai che qua sa tracti d'artists che vivan e duain er pudair viver da la cultura. Tar la cultura da laics è igl engaschament gratuit e gida la cuminanza e la cultura locala.» Anc pli exprimì saja quai en il sport, nua che millis persunas s'engaschian sco voluntaris per sustegnair las occurenzas. «Tant tar la cultura sco era tar il sport sustegna il Chantun occurenzas da cultura da laics, per che quellas occurenzas possian vegnir exequidas cun ina tscherta qualitad», di il cusseglier guvernativ.